

مرند اۆيکو

Mərənd öykü



سومسوک ایت

یازار: حمید آرغیش

Web address: www.marand-oyku.arzublog.com

Facebook: www.facebook.com/marandoyku

Email: rezaaydin491@yahoo.com

سومسوك ايت

يازان: حميد آرغيش

گونش باتيدا اولان داغلارین آرخاسیندا گیزلنمکده یکن، نئچه بولود هر دن گونشین قاباغیندان کئچیب چۆلدە اوّلو کۆلگەلر تۆرەدیردیلر.

بین الخالق یولدا بۆیوک، کیچیک ماشینلار سورعتله گل - گئتده ایدیلر. گۆیون سول بۆیرو نارینجی رنگده ایدی. گاهدان سرین یئل اسیب، چۆلون گوّه و تیکانلارینی اویونا توتوردو. جاده نین قیراغیندا، بۆیوک بیر داشین کناریندا بیر ایت اوزانمیشدی. ایتین اوزانیدیغی یئر، شهره یاخین بیر کندين تورپاق یولو ایله جاده نین قووشاجاق یئری ایدی. ایت قومرال رنگده ایدی. چوخ آریق و گوجدن دوشموش نظره گلیردی. ساغ قیچی اوسته قوروموش بیر یارانین دۆوره سینه نئچه چیبین فیزلانیر، گاهدان دا یارا اوسته قونوردولار. ایت ایسه قویروغو ایله اونلاری قووردو. قانی قورودوغو یئر نئچه گونلوك بیر یارا ایدی.

آرتیق سورو ایتینه بنزه یین بو ایتین قویروغو چنبرلی، قولقلاری دا کسیک ایدی...

ایندی آرالاردا قالمیش بو ایت، بیر زامان اۆزو گۆرکم و اۆتکملیه مالیک ایدی. قیداسی واختیندا حاضر اولار، واختیندا گئدیپ یوواسیندا یاتاردی. آما روزگارین چوخ اویونو اولار. بو ایت تزه لیکده سومسوك ایتی اولموشدو...

بوندان اۆنجه، بو جاده یه یاخین بیر کندين چوبانی نین داوار ایتی ایدی. اونون ایشی 200 داواردان موغایات اولماق ایدی... بیر گئجه قورد سورویه چاتیر، ایکی داواری تیکه - پارچا ائله ییر. بو ایسه چوبانین یوخلاماسینا گۆره ایدی. آما چوبان ایتی سوچلا ییب، داوارلارین زنگین ییه سینه دئیر:

"بو ایتین داها داوارلاری قوروماق باجاریغی یوخدور. داوارلاری بونا تاپیشیرماق یانلیش بیر ایش دیر.."

ایتین گوناھی یوخ ایدی. چون 200 داواردان موغایات اولماق 4 - 5 ایتین ایشی ایدی، آما داوارلارین صاحبی اۆز مالین تهلکه ده گۆردوکده ایتی او گون تپیکله انشییه آتدی. "قروش" آدلانان ایت نئچه ایل اربابینا وفالی قالماغی نین مکافاتین آلمیشدی.. ایت نئچه دفعه اربابین قاپی سینا و سورونون دالینا گئتدی، آما هر دفعه نئچه سۆیوش و تپیکله قارشیلاییردی.. اونون یئرینه ایکی ایت گتیرمیشدیلر. بللی ایدی نئچه گوندن سونرا لیاقت سیزلیکلرین گۆستره جکلر. "قروش" قوولدوقدان سونرا داها قالماغا بیر یئر تاپمادی. کوچه لر ایتی اولموشدو. اوشاقلار اوّللر بیله سیندن قورخوردولار؛ آما یاواش - یاواش اوزلری آچیلیب، اونا داش آتماغا باشلادیلار. قروش اوّللر هیرس له نیر، هافیلدا ییردی. نئچه گون اونلاری قاپدی. آما گۆردو بو ایشی اونلاری آرتیق

اۋجەشديرير... داھا اونلارین داشلاماسی قاباغیندا دینمیردی. نچە گون اۋنچە بیر اوفاجیق اوشاق اونا برک ایجەشرکن اونون یانین قاپدی. اوشاغین آناسی گلیب آعاجلا او قەدەر ووردو کی، ایکی گونەدک یئردن دورانمادی.. دونن اوشاقلار یئنە اونو داشلادیلار؛ قیچی برک یارالاندى.. آخیردا کئنددن چیخیب، آخسایا - آخسایا قاچماغا مجبور قالدی. ایت مجبور ایدی بر بیابانی بیر تیکە یئمک اوچون دولانسین، آما هر اۋینە آج قالیب، اۋیلە یاتیردی.... ایت نچە کی یاتمیشدی، بیردن بیر ماشین سسی یوخوسونو پوزدو. اُت آپاران بیر کامیون، ایتین یانیندان کئچیب گئتدی. ایتین بورنونا اُت قوخوسو دەیینجە جان تاپدی. قول قاناد تاپدی.. تئز آیاغا دوروب کامیونون آرخاسیجا قاچماغا باشلادی. قیچی نین آغریسینا، اینجیمەسینە باخمایاراق سورعتلە کامیون دالیجا گئدیردی.

گونشین سون ساچاقلاری گۈدەسینی آرتیق آریق گۈستیریدی. ایندی بیر تیکە سوموک دالیجا قاچان ایت بیر زامان 200 اُت قایناینین قوروجوسو ایدی. آما اُت ماشینى ایلغیم حۈکموندە ایدی. بیر گۈز قیرپیمیندا ایتین گۈزوندن غایب اولدو. قروش قاچماقدان داپاندى. کامیون جادەنین بوروغوندا محو اولدو. گئری دۈندە کئندین داش - تورپاقلی یولوندا توزدان یارانان بیر دومانین یاخینلاشماسینی گۈردو. گونون باتماغا یۈنەلن ساچاقلاریندا بو توزون نە اولدوغو بللی دئییلدی. دومان یاناشدیقدا بیر ماشین اولدوغو آیدین اولدو.

ایت ماشینى گۈردوکدە اونا ساری قاچدی، بلکە بیر زاد اونا آتالار.. بو ماشین بیر نیسان پاترول ایدی کی، آداملاری گزمکدن گلیردیلر. ماشین دا دۈرد کیشی اوتورموشدولار. بیرىنین قول آچیق یاشیل پالتاری واریدی. قارینی یوغون اولان بیر کیشی قارا رنگدە اولان بیر آرخالیق چیینلرینە آتمیشدی. باشیندا دا آغ بیر بۈرک "حامامبوخچا" سینا اوخشا بیردی. سوروجونون یانیندا ایسە گنج قیلیقلى اوغلان اوتورموشدو. سوروجو ایسە قارا ساققال بیر کیشی ایدی. بونون پالتاری کیرلی ایدی. اۋزودە اوچ نفرین ترسینە دئییب، گولمکدە اشتراک ائتمیردی. یوغون کیشی سوروجویە خطاب: "اوغلان! یاواش گئت! ایستیرەم بو ایتین حسابینا یئتیشەم" - دئدی.

یانینداکی: "یازیق دی!... بو راخ گئتسین!" - دئدی.
" یوخ! قوی اونو هورومکدن سالیم..". گولە - گولە جاواب وئردی.
اوچ کیشی گولدولر. ماشین اصلی یولا چاتارکن سورعتدن دوشدو. ایت آرتیق اۋجەشیب ماشینا ساری قاچدی. ایندی دوز ماشینین ساغ طرفیندە قاچیردی.. گۈزلە بیردی ایندیدی کی آجلیقدان چیخاجاق. آما بیلمیردی بو بیر طرفلیک آل - وئرن چۈرەیی اولماز..

ايت دالى قاپى نين كناريندا قاجديقدا، بيردن ماشينين قاپيسى آچيلدى. ايت ايچرى تپيلمك ايستهدى، آما تزه باشى قاپى آراسيندان ايچرى گيرميشدى كى، قارينى يوغون كيشى قاپينى كيپلهدى. ايتين باشى قاپى آراسيندا قالدى. بيردن قاپى آچيلدى. ايت يئره سريلىدى. ايتين باشى گيجهلدى. داها دؤوره سيني آشكار گؤرموردو. گؤزلى قارالميشدى. ماشين سورعتله اوزاقلاشدى. دونيا باشينا فيرلانيردى.. ايندى دوز جاده نين اورتاسيندا ايدى. آما هئچ يئرى گؤرموردو. توولانا - توولانا يئريبيردى...

بيردن بير قارالتى نين ياناشماسين دؤيدو. او بير يوك ماشينى ايدى. آما او ترينمه دن طاقت سيز بدهنى يوك ماشينى نين آغير تكرلى آلتيندا قالب، ازيلدى و جاده نين قارا تكيه ياخيلدى. ايندى گونش تاماميله باتميشدى.

=====

و سنین حكايه لريم... - كيتابيندان..